

Buna sira! Buna sira, me cari siuri, e ben c'me cla va? L'è turna Nadal, a suma turna chi.

U temp el vula, u smeia ieri che gavondsi la prüca e i suclòn, dop l'ultima rappresentasion, as salutavu: Ciao, sta ben, Mafè, bei pù sa barbera, se non ut vén el preij anche an tla curadela; tei Gelindu anpinisti nent semper cme na titeina, se no ut ven na ponsa che stai pù an tel braii; te Tirsi finisla ad fè semper u souta ciuendi, finisla d'andè da chi e dalà a fè el ballo liscio, ormai t'ai 32 ani, t'ai quasi i spron; tei S. Giusep decidti, spusa la Madona, finila ad uardev semper ant'ioegg.

A suma turna chi cun in ani an pù an su reinòn, trücà cme del muli a la fera, a fè i stüpid e i uataròn an suma d'is palc. Noi, per la verità, a fè i stüpid a fuma meia ad fadeia; u noster regista an t'el provi el cuntinua semper a ripeti: "I devi esi natural, i devi nent fè Gassman! Fè cme chi seij tücc i dì an t'la vita!".

Eh, la me cara gént, ista a l'è l'ultima vota ca recituma acsi chi andrenta; el prosim ani, sta Divota Cumedìa a la fuma an cul "Castello incantato" ca l'è u teater comünal an ti giarden, a lè talment Incantato cus bugia pù, a l'è semper al medesim punto.

I devi avei pasiensa, noi a suma di pover uataròn, ca suma bon ne a parìe ne a tasi, a j'uma nent a facc el scöli outi, a j'uma nent stüdià, a suma vegg; na vota l'era nent cme adès chi stüdiu tücc perchè u j'è l'istruzione obligatoria, ammac l'ignuronsa a l'è facultativa! ades...

Noi però a sercuma cme ca suma bon, ad fèv capì el mister ad cula nocc meravigliusa; ad capì, prima noi che voi, el mesagi cl'a purtà cula sonta Masnà! "Pàs an tera a tücc j'omi ad boina voluntà".

Pàs an tera! Ist mond u smeia dventà in caudron ch'el bui, pù che in caudron, u smeia na pentula a presiòn, che da in mumént a l'ater a l'abia da sciupè.

Ui pasa nent 15 dì che an cuca part del mond ui souta fora cuc bugnòn, e i son nént bugnòn chi uarisu an doi o trei dì; per fèi pasè ui và di meis, tanti voti d'iani antrèj, antont quonta gent la perd la so vita, quonti famij aruinaij, quonta distrusion.

Pensè che il disgrasi i venu sa per so chént. Iej vist cul cu j'è suces cuc

meis fa an tel Friuli per u teremòt, an Cina, ades anche an Turchia; quonta gént le armasa senza pù la cà, senza pù in vestì, senza pù in toc ad pon da mangè; duvei pasè l'invern andrenta del barachi, del tendi, del rulot c'me i sengher.

Omi ad boina voluntà! Ma andò chi son andacc a finì, an gir u s'na vigh pù meia, a suma tücc d'iarrabbiati. A i'uma tücc la voluntà ad ste pù ben c'us pò e ad nent pensè per i'ater.

L'amporta ad gnente se u to avsen u sta màl, a l'à dabsogn cüc cosa che magari tei tl'ai an suvra pù, ansèn a l'è pù dispost a fè el pù cit sacrifici per jütè in ater, ognadèn el pensa per so chënt.

Propi, propi tüt el cuntrari ad cul cl'è avni a mustremi u siur Messia!

Eh! la me cara gent a suma an crisi, us po' pù andè avonti, us po' pù andè avonti a pe', cun tüt is machini, u s'è pù tranquil monc an si marciapé, u i'è el pericol ad fès sgnachè cme na cutlèta panaja. Ra bensina la custa pù del ven; certo che se i'anventeisu la manera ad fè andè i'automobil a barbera e grignulèn u sareisa in bel afari: a sareisu tücc pù algher a guidarreisù menu da arrabià che adès.

"Ferma in mument, peia in bicer, sagia sta barbera super ca i'ò bità ieri ant'el mutur; la fà 13 gradu e mès".

"Mei anveci cun la sciunfèta ca i'ò a vag a mëscia".

U i'è la crisi turistica, i'alberghi e al pension per ist festi, per el ferij, i son tücc pen cme in ov, i sän pù andò biteij; i sindacati i son stacc custrèt a lancè in proclama "Lavoratori di tutto il mondo unitevi, ma an t'el ferij, au Sabet e la Duminica sparpagiatevi". I sei tücc jën ados a l'ater.

La groina pù grosa a l'è che oltre noi Italion, c'a'suma sa in mügg e mès, ui ven anche in mügg d'americon, in mügg ad tugnèn, ad plüfen; va ben ch'im portu del gron, ma se anche i tudësch e i'americon i fon i pont, la settimana corta, i von an ferij i vori spieghèm chi cu travaia ancora? I prësüt per salvè la nostra lirèta, chi cu mj a dà pù?

U i'è la crisi an t'el mangè, tüt el custa l'os del col, entrè dal maslè, us ven fora bei e spulpà, cun cul c'la custa na cutlèta, u sa pù el curagi ad mastiela, us ciücia cme na caramela!

L'unica roba ancora a bon presi i son el murtadeli, ma dop a cula groina di Molteni, nent per esi smorbi, ma ai trov in güstén, ch'im von pù ne sü ne zü.

U i'è la crisi an ti Cumën, an t'el Region, j'on pü meia ad sold i son pulid cme di fònt da pichi; pensè che cun tüt el tasi chi im fon paghè degl'entradi ui na i'è in mügg. I devu esi degl'asiendi faci a turtrò, in turtrò bità aul'incuntrari, per entrè el bogg l'è cit, per l'uscita a l'è gros dacsei! I duvreisu pruvedì a girè i bogg.

A lè dventà tüt in gron ris e fasò, sta crisi a l'è propi dapertüt: an t'la scola, an t'la famija. An ca us sà pu chi ch'el cmonda. Da quondi el feministe j'on piantà la groina dla parità, anche i'omi an ca i voru di la soua, i voru mandè el muiè a fè u suldà; i fiò us sapü se chi disu, cun la radio o u giradischi a tutto volume, chi creiu cme di strasè, an ca, a fuma ammac pü di sign cme di sordomuti.

An tla Television us sa pü se uardè: cul cu dis el prim canal an su sgond a l'è medesim, ma tüt al cuntrari! I von ammac pü dacordi an sel prevision tu témp. El piov semper dapertüt: i poru nent sbagliesi!

Anche chi an ti Frà u i'è stacc di cambiament: u noster Asistent l'ha facc cariera, j'on hità i gradi da guardiàn e tont per cambiè la monc pagà la festa: u dis cu s'è ciapà la "stangata" e ca l'è pulid cme 'n spegg.

Anche per noi acsi chi u'76 l'è stacc in ani brüt dabon. I m'on lasà per semper P. Alfonso, in lisandrèn propi cme noi, avni fora da ista Asuciasion; l'era turnà a Lisondria dop 20 ani ad mision an Africa, l'era semper cun noi, l'era cul cum difendiva semper quondi ca cunbinavu cuc mastion.

U m'ha lasà anche el P. Francesco ca l'è stacc per 16 ani u noster Asistent, l'è stacc cullà cu m'a tirà sü propi da fanciòt, cullà che an ti prüm ani ad Gelindu, quondi chi avu monc ancora u giradischi, cun la so vus anuisa el fava la vus d'la Madona cla cantava la Ninna Nanna al Bambèn.

U Signur u l'ausì ansema i so angel a cantè la so gloria! A l'è anche per lur c'a cuntinnuarruma semper a fè sta Divota Cumedia.

Voi i dirrei: ma chi calè is chi lei ch'el finis pü ad fem la predica acsi lè ansüma? Mei chi ca son? Mei a son Gilindu e adés av present ra me famija.